

ERREAKZIOAK

«Alderdien arteko lankidetza aukerak zapuztu dituzte», dio Jaurilaritzak

Cossigak «estalinistatzat eta frankistatzat» jo ditu Garzon eta Espainiako Gobernua, eta elkartasuna adierazi die Batasuneko kideei

Erredakzioa | DONOSTIA

«Alderdien arteko lankidetza aukerak zapuztu dituzte Batasuna legez kanpo uzteko talde politiko batzuek hartutako alde bakarreko erabakiek», ohartarazi zuen atzo Jaurilaritzako ele-dun Josu Jon Imazek. Ildo horretatik, «ETari aurre egiteko diagnostiko bateratua lantzeko

bideak» zokoratu izana egotzi zien Imazek ilegalizazioaren alde azaldutako erakundeei, eta adibide gisara aipatu zituen urte hasieran Ibarretxe lehendakariak deitutako mahaiak.

Jaurilaritzako bozeramaileak esan zuen Batasuna legez kanpo jartzeak euskal gizartearen zati bat «klandestinitate politikoan» irautera derrigortzen

duela. Imazen aburuz, gainera, «euskal gizartearen gehienak Batasuna amaitzearen aurka daude, baita PP eta PSOEko hainbat euskal hautesle ere». Areago, Imazek ohartarazi zuen ilegalizazioak ezker abertzaleko «alderdi erradikalenak» indartuko dituela.

«Tentsio politiko eta soziala»

PSEko diputatu Ramon Jauregi ere mintzatu zen atzotik aurrera Euskal Herrian gerta daitekeenaz. «Tentsio politiko eta soziala gordina izango da», esan zuen.

Jauregik EAJri leporatu zion «erakundearen botoak eskura-

tzeko soilik» azaldu dela Batasuna legez kanporatzearen aurka azaldu izana. On ez deritzeten erabakiak betearazteak Jaurilaritzari enbarazu egiten diola azaldu zuen Jauregik: «Indarririk gabeko gobernua da».

Italiako Errepublikako presidente ohi Francesco Cossigak, berriz, elkartasuna adierazi zien Batasuneko kideei. Gainera, Garzon epailea eta Espainiako Gobernua «estalinistatzat eta frankistatzat» jo zituen, hurrenez hurren. «Bortizkeria politiko eta soziala» erabiltzea leporatu zien.

JOSU JON IMAZ

(Jaurilaritzako bozeramaile)

«Euskal gizartearen Batasuna legez kanpo jartzearen aurka dago, baita PP eta PSOEko euskal hautesleak ere»

«ETari aurre egiteko diagnostiko bateratuak lantzeko bideak hondoratu dituzte»

RAMON JAUREGI

(PSOEko diputatua)

«Tentsio politiko eta sozial handia ekarriko du ilegalizazioak»

FRANCESCO COSSIGA

(Italiako presidente ohi)

«Bortizkeria politikoa eta judiziala darabilte Espainiako Gobernuak eta Baltasar Garzonek»

ARALAR

«Herriarrei eta indar politikoei dei egiten diegu, PP eta PSOEren erasoei behar bezala erantzuteko»

EUSKO ABERTZALE EKINTZA

«Neofrankistek uste dute Batasuna legez kanpo utzi eta gatazka amaitua dela»



ARGAZKI PRESS / MARISOL RAMIREZ

Batasunaren Bilboko egoitzan bildutakoak Ertzaintzari aurre egiten, atzo.

ARALAR

Garzon epailearen eta Espainiako Parlamentuaren erabakien aurkako iritzia azaldu du Aralarrek

Garzon epaileak eta Espainiako Kongresuak atzo hartutako erabakien aurkako iritzia azaldu du Aralarrek. Ebazpenari kritika egin, eta ohartarazi du autodeterminazioaren bitartez independentzia lortzeko eskubide osoa daukala Euskal Herriak. Aralarrek indar politiko guztiei eta herritarrei dei egin die, «PPk eta PSOE bultzatutako erasoari behar bezala» erantzuteko: «Giza eskubide garrantzitsuak urratzen direnean, ez da aski diskurtso etiko bat egitea». Aralarrek, gainera, Batasunarekin harremanetan jarraitzeko asmoa iragarri du, «edozein dela alderdi politikoaren egoera».

EUSKO ABERTZALE EKINTZA

«Pase forala berehala» abian jartzea galdatu dio Eusko Abertzale Ekintzak hirukoari

Eusko Abertzale Ekintzak «pase forala» baliatzea galdatu dio Jaurilaritzari, «berehala». Gainera, Garzoni eta Espainiako Kongresuari men egitea egotzi dio hirukoari: «Neofrankistek uste dute Batasuna legez kanpo jarri eta gatazka amaitua dela. Oraindik, 600.000 botoen alderdiek isilik jarraitzen dute. Ez ditzatela errepika orain arteko okerrak».

ATXILOKETAK

Zazpi lagun atxilotu zituzten atzo, Bilbon eta Donostian

Ertzaintzak zazpi lagun atxilotu zituen atzo Bilbon eta Donostian. Bizkaiko hiriburuan, neska bat eta hiru mutil atzeman zituen Poliziak, ustez kale borrokako ekintzetan parte hartzeagatik. Eduki-ontziak erre eta autobus bat kiskaltzen saiatzeagatik atxilotu zituzten, Ertzaintzaren hitzetan betiere. Gordoniz eta Larraskitu kaleen artean jaso ziren atzoko istiluak. Donostian, berriz, hiru pertsona atzeman zituen Ertzaintzak. Autobus baten aurkako harriak jaurtikitzea leporatu diete, eta ibilgailuan zihoan bidaiari bat zauritzea. Barne Sailak atzo bertan adierazi zuenez, 20:30ean jazo ziren Donostiako atxilotetak. Ertzaintzak uste du edukiontzia gurutzatzen zebiltzanen artekoak direla hirurak.

MOBILIZAZIOAK

Elkarretaratzeak gaur Baionako Kontsulatuaren aurrean, eta etzi UPNren eta PSNren egoitzen aurrean

Batasunaren aurkako neurriak gaitzesteko, Batasunak deia egin du Baionan elkarretaratzea egiteko, gaur arratsaldeko zazpitan, Espainiako Kontsulatuaren aurrean. Bestalde, etzi UPNren eta PSNren egoitzen aurrean egitekoak diren kontzentrazioetan parte hartzeko deia egin zuen atzo Fernando Barrena legebiltzarkideak. Batasunaren jarduerak eteteko aginduak ez duela ezker abertzalea «jokoz kanpo utziko» adierazi zuen Barrenak.

PSN

Batasunaren aurkako neurria Iruñeko Parlamentuan nola gauzatu jakiteko, txostena eskatu du PSNk

Baltasar Garzon epaileak Batasunaren aurka harturiko neurriak Nafarroako Legebiltzarrean nola gauzatu jakiteko, txosten juridikoa eskatu du PSNk. Juan Jose Lizarbe PSNko idazkariak Parlamentuko zerbitzu juridikoei eskatu die, Garzonen erabakiak Parlamentuko jardueran zein eragin izanen duen jakiteko. Izan ere, Garzonek astelehenean kaleraturiko autoan ordezkaritza duen erakundeetako jarduerak haien irizpideen baitan uzten dela esaten zuen. Lizarbek hori argitzeko eskatu die zerbitzu juridikoei.